

**Semua negeri Pakatan kembali guna satu tema Merdeka
MalaysiaKini.com
8 Ogos, 2012**

Tiga negeri yang dikuasai Pakatan Rakyat - Pulau Pinang, Kedah dan Kelantan - dijangka menarik balik keputusan awal mereka untuk menggunakan tema Hari Merdeka masing-masing.

Sebaliknya, ketiga-tiga negeri itu akan menyertai Selangor meraikan Kemerdekaan ke-55 dan Hari Kebangsaan ke-49 dengan tema Sebangsa, Senegara, Sejiwa.

Setiausaha Agung PAS, Mustafa Ali berkata beliau telah dimaklumkan oleh pegawai Menteri Besar Kedah bahawa kerajaan negeri itu telah memutuskan perkara itu hari ini, manakala Kelantan berbuat demikian semalam.

Sementara itu, Timbalan Ketua Menteri I Pulau Pinang Datuk Mansor Othman, mengesahkan kepada Malaysiakini bahawa beliau akan membuat pengumuman yang sama esok.

Perkembangan terbaru itu hanya beberapa jam selepas Pulau Pinang mengumumkan ia akan menggunakan temanya sendiri - Budaya Bersih, Merdekakan Rakyat - dan tidak menggunakan tema alternatif itu yang dicadangkan oleh kepimpinan tertinggi Pakatan Rakyat, yang telah diterima oleh Selangor.

Ia juga ekoran kritikan hebat dari penyokong Pakatan manakala pemimpin BN pula turut mengejek gabungan yang didakwa mereka tidak sepakat.